

Nunatsinni inuit innarluutillit ilinniartitaanikkut suliffeqarnikkullu atugaannik misissuinerup kingusinnerpaamik UPA 2020-mi saqqummiunneqarnissaanik Inatsisartut aalajangiiffigisassaattut siunnersuut. Ilinniarfiusinnaasut suliffiusinnaasutullu piukkunnaatillit qanoq tapersorsorneqartiginerannik aammalu inunnit pineqartunit inuiaqatigiinnillu pisariaqarneratut atorineqartiginerannik erseqqinnerusumik qulaajaanermik misissuineq imaqassaaq, soorluttaaq misissuineq inuit innarluutillit ilinniartitaanerannut suliffeqarneranullu tunngasumik siunissami ilisimasaqalernissamut qulakkeerinnittumik aalajangiisoqarneranik malitseqartinneqassasoq.

(Inatsisartunut ilaasortaq, Aqqa Samuelson, Inuit Ataqatigiit)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Siullermeerneqarnera

Inuit innarluutillit ilinniartitaanikkut suliffeqarnikkullu atugaasa misissorneqarnissaat pillugu siunnersuummut saqqummiunneqartumut Naalakkersuisut siunnersuuteqartoq qujaffigivaat.

Naalagaaffiit Peqatigiit inuit innarluutillit pillugit isumaqatigiissutaat naapertorlugu inuit innarluutillit allat assigalugit suliffeqarsinnaatitaapput. Isumaqatigiissummi aamma allasimavoq naalagaaffiit isumaqatigiissummut peqataasut ilinniartitaanermit peqataalersitsinissaq qulakkiissagaat.

Suliffeqarneq ilinniagaqarnerlu inuit ataasiakkaat imminnut isiginerannut atugarisaannullu pingaaruteqarlunnarput. Pineqartut taakkua inuiaqatigiinnut peqataanermik misigisaqarnissamut qitiullunnarput. Aamma inuit innarluutillit suliffeqarnermit ilinniartitaanermullu peqataatinneqaraangata inuiaqatigiit suliffeqarfyllu ataasiakkaat annertuumik iluanaaruteqarlutillu isumalluutissaqalersarput.

Naalakkersuisunit ukkatarineqartuarpoq inuit innarluutillit atugarisaasa pisinnaatitaaffiisalu pitsanngorsaaffigineqarnissaat. Tassa ilaatigut suliffeqarnermit ilinniartitaanermullu politikkerput aqutigalugu peqataatitsissaagut aamma inuit innarluutillit pisariaqartumik tapersorsorneqarnissaat paasineqarnissaallu qulakkiissavarput.

Inuit annertuumik innarluutillit ikiorserneqartarnerat pillugu Inatsisartut peqqussutaat naapertorlugu inuit ikiorsiissutinik pisartut assigiinngitsupilussuupput. Inunnik innarluutilinnik peqataatitsinissap qulakkeerneqarnissaa pineqartillugu pingaaruteqarpoq erseqqissaatigissallugu tamanut aaqqiissutissamik ataasiinnarmik suliaqarsinnaannginnerput. Pineqartut inuupput assigiinngitsorpassuarnik innarluutillit assersuutigalugulu tassaallutik inuit paasinnittaatsimikkut piginnaasakitsut, timimikkut piginnaasakitsut aamma

eqqarsartaatsimikkut piginnaasakitsut. Pingaarnertut pineqartut taakku iluini aamma inuit pisinnaasaat, pisariaqartitaat kissaataallu assigiinngitsupilussuupput. Taamaammat suliniutissat assigiinngitsupilussuit matumani aallartinneqartussat pineqarput.

Naalakkersuisut siunnersuuteqartoq isumaqatigivaat, tassa inuit innarluutillit qassit suliffeqarnersut aamma qassit ilinniakkaminnik naammassinissimanersut qassilluunniit ilinniarnermik ingerlatsinersut qulaajaaffigineqassasut isumaqatigivaat. Maannamut pineqartunik naatsorsuisoqarsimanngilaq. Naalakkersuisulli suliassamik piareersaallutik aallartissimapput, kommunit inuit innarluutillit pillugit naatsorsuineri taavalu inuit innarluutillit ilinniartitaanerannut suliffeqarnerannullu naatsorsuinerit ataatsimoortilernissaat siunertaralugu. Naalakkersuisut inuit innarluutillit akornanni qassit suliffeqarnersut qassillu suliffeqannginnersut kiisalu inunnut innarluutilinnut ilinniakkat qaffasissusaat 2019-2020-p ingerlanerani taakku naatsorsorneqarnerisa saqqummiunnissaat naatsorsuutigaat. Naalakkersuisut isumaqarput tamanna aallaqqaammut qulaajarneqartariaqartoq, tassa taamatut naatsorsuinerimi angusat kingusinnerusukkut misissuinerit tigussaasumik kinguneqartumillu ingerlanneqarnissaannut tunngavissiisinnaammata.

Naalakkersuisut taamatut oqaaseqarlutik siunnersuut itigartinneqassasoq inassutigaat.